



**Naalackersuinikkut sulinermut aningaasatigut tapiissuteqartarneq pillugu Inatsisartut inatsisaat allanngorteqqullugu Naalackersuisut peqquneqarnis-saanik Inatsisartut aalajangiiffigisassaattut siunnersuut, maannakkut periuseq imatut allanngortillugu, partiit Inatsisartuni sinniisuutitaqartut tunngaviusumik 850.000 koruuninik tapiissummik pisalersillugit kiisalu kingullermik Inatsisartunut qinersinerup inernera tunngavigalugu taasinermut ataatsimut 200 koruuninik pisalersillugit. Attaviitsut taasinermut ataatsimut 200 koruuninik ukiumut tapiissutisalisarneqassapput agguaqatigiitsineq 1/31 atorlugu kiisalu taasinerit tamarmiusut tunngavigalugit. Allanguineq atulersinneqassaaq ulloq 1. januaari 2019 aallernerfigalugu.**

(Inatsisartunut ilaasortaq Randi Vestergaard Evaldsen, Demokraatit)  
(Siullermeerneqarnera)

Demokraatini isumaqarpugut pisortat ingerlatsinerat annertuallaartoq, aamma akisuallaartoq. Taamaammallu pisortat ingerlatsinerat annikillisarussupparput akikinnerulersikkusullugulu.

Ukiuni amerlasuuni pisortat ingerlatsinerat annertusiartuinnavissimavoq akisuneruleriartorlunilu. Uangut Demokraatini angorussupparput tamanna killormut saatissallugu. Uangut Demokraatini tulluurtutut isigaarput uangut politikerit maligassiuisuunissarput, taamaammallu siunnersuutip massumap qiterisaa maligassiuinertut isigaarput.

Siunnersuut akuerineqassappat Nunatta Karsia ukiumut 2.725.600 kr.-inik sipaaruteqassooq. Taakkua aningaasarpassuupput, aningaasartuutaasartullu 20 %-ingajammik annikillineqassallutik. Taava takorlooriartigut nunatsinni pisortat ingerlatsinerannut aningaasartuutit tamarmiusut 20 %-imik appartittuugaluarutsigit.

Oqallinneq sumut tamaannga sangutinneqannginnerani naqissusereerusupparput Demokraatini siunertarinnginnatsingut pisortaqaarfiit ingerlatassaasa qitererpiangaannik kiffartuussinernik ajorseriartitsinissaq.

Aamma erseqqissareerusupparput assortunnginnatsigut inuit tamat oqartussaaqataanerat akeqarmat, imaassanngilarli aningaasartuutikinnerusumik ingerlanneqarsinnaanngittoq. Uangut Demokraatini isumaqarpugut siunnersuut akuerineqarpat inuit tamat oqartussaaqataanerat innarlerneqarunnangittoq, partiiimmi ilutsinni aningaasartuutinik pingaarnersiullaqqissuseqarlutalu aqutsisinnaassuseqartariaqaratta.

Taamannak oqaaseqarluta siunnersuut akueraarput, partiillu allat oqaaseqaatissaat qilanaaralugit.